

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 25 (1936)

Artikel: Plaid de beneventaziun en occasiun della Romania a Sedrun
Autor: Monn, F.
DOI: <https://doi.org/10.5169/seals-882090>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 22.02.2026

ETH-Bibliothek Zürich, E-Periodica, <https://www.e-periodica.ch>

Plaid de beneventaziun en occasiun della Romania a Sedrun da Fel. Monn.

Undrada radunonza festiva!

Stimada raspada romontscha!

Igl ei oz pauc si pauc giu in tozzel onns, che la Romania ha fatg sia emprema viseta als Tuatschins. Ed oz selegrein nus de saver far beinvegni ad ella per la secunda ga en nossa val. Nus selegrein de Vossa vegnida, dil cumin romontsch della Romania ella val Tujetsch, perquei che ses commembers, ils giuvens ed ils grischs, portan tras nies temps la bandiera d'in grond ideal: l'amur e premura per il lungatg artaus dal best matern schi car.

Ch'il carstgaun dedicheschi ina gronda part de siu panzieri e de siu luvrar al quitau per il paun de mintga di e per siu viver, quei ei natural ed ei in basegns nundispiteivel. Mo quei fan era ils animals malraschuneivels. Il carstgaun che aulza siu tgau e sia egliada envers ils aults, encunter las muntognas ed il tschiel blau, sto dar in grond plaz, in plaz reservau en siu intern all'amur per ils beins ideals della veta, ch'ei la megliera part de quella ed entras ils quals el sedistingua per dallas creatiras malraschuneivlas. Ed igl ei forsa oz pli necessari che zacu, oz, nua ch'ils schliats temps derasan il criu e brut materialissem pertutanavon, nua ch'il combat per il paun smanatscha de prender a nos egls la vesida per las grondas caussas idealas e nua ch'ina mentalitad zanistrada empeila il sentir

e patertgar de biars per vias puleinas. Oz, mes stimai commembers della Romania, adempris Vus ina nobla, ina necessaria missiun culturala, ideala, che duei, sche Dieus vul, far rempar a tut quels prighels che vulan sgurdinar e sclavinar il sentir e patertgar de nos dis.

Nus selegrein de Vossa viseta era per raschun, che Vus leis undrar oz da cuminonza in um, che ha dau exempel en maniera distinguida, co nus duein stimar e carezar patria e lungatg ed alzau la bandiera digl idealissem en tut nies far e demanar. Vies cumin romontsch ei dedicaus a nies nunemblideivel P. Maurus p. m. Jeu sai e vi tralaschar de far il pictur els detagls de sia veta e de siu fritgeivel operar.

Sch'igl ei denton la verdad, che P. Maurus apparteneva a tuttas valladas digl entschess romontsch, sche perdunei mia vana gloria de dir, ch'el fuvi in special amitg e stedi hosp della val Tujetsch, gie ch'el eri en cheu sco da casa. Perquei s'unescha era igl entir pievel tuatschin da tut cor alla Romania per undrar oz en speciala maniera la memoria d'in dils megliers fegls della tiara e mumma romontscha.

Vossa viseta, stimai commembers della Romania, fa denton plascher a nus aunc per ina tiarza raschun. Ella confirmescha nies agen sentiment, che nossa vischnaunca seigi solid tratsch e tschespet romontsch. E la viseta della Romania possi enfirmir en nus la voluntad de mantener tiara e pievel fideivels al lungatg, alla patria ed allas tradiziuns de nos buns vegls. La carezia e stema per ils beins artai dals perdavons ed il vuler mantener quels nunsmasai seigi per mintga Tuatschin ed en special per la giuventetgna ina missiun d'

h o n u r, che nus lein ademplier c u n t u t l a s
f o r z a s de nies spért e cor.

Igl ei bein ver, che nus essan dalla vart
dil Cuolm d'Ursera vischins dils Tudestgs. Mo
buca tema che la germanisaziun smanatschi
nossa val neu dal pass de Tiarms. Il tierm si
leu duei buca mo restar tierm denter Uri e
Grischun, mobein era denter tudestg e ro-
montsch. E schebi che famiglias tudestgas ein
emigradas sur Cuolm els tschentaners vargai,
ils de Tujetsch ein stai fermes avunda de dar
a tuts quels tun e tempra romontscha.

Era da part della carschenta industria de
jasters maungl'ins buca temer ina germanisa-
ziun della val Tujetsch. Senza vuler snegar als
hosps de nossa val la stema ch'ins ei culponte
al concarstgaun de quella e tschella naziun,
nus essan decidi detschartamein de ceder gnanc
ina miula de nossas tradiziuns e de nies lun-
gatg. E nus vegnin confirmai en quella reso-
luziun dalla gronda part de nos curants sez,
che steman ed han bugen nossa val e nies pie-
vel gest per raschun ch'el ei aunc buca mo-
dernisau e muossa cun luschezia ded
esser in pievel cun atgna viarva e cul-
tura.

Stimai compatriots! Quellas ein las ra-
schuns muort las qualas nus selegrein de Vos-
sa viseta cheu en nossa val.

E cun l'expressiun de nies legherment u-
neschel jeu il fervent auguri alla Romania, ch'
ella possi luvrar cun ardiment e success per siu
ideal: per il manteniment e la cultivaziun della
viarva romontscha.

Ed a nus Tuatschins augurel jeu la stattei-
vladad en nos beins ideals e che nossa visch-
naunca possi restar entschess romontsch aschi-

ditg ch' il Six-Madun fa guardia als confins de
nossa val.

Cars commembers della Romania! Vies
ideal ei era nies ideal; vossas mi-
ras ein era las nossas.

En quella cuminonza dil sentiment enviers
il car lungatg della mumma fetsch jeu a Vus
tuts il beinvegni della vischnaunca e digl en-
tir pievel de Tujetsch.
